


09 IANUARIE / 03 IULIE

**ACATISTUL
SF. IERARH
FILIP 2,
MITROPOLITUL
MOSCOVEI
ȘI ÎNTREGII RUSII**



ACATISTIERUL PE IANUARIE-RU



Акафист
святителю Филиппу,
митрополиту Московскому
и всея России чудотворцу

Кондак 1

Избранный от Господа сил Российских
первопрестольников преемниче, славным
подвигом исповедничества, яко светило
златозарное, озаривый Церковь православную,
чудесы велиими и нетлением твоих мощей от
Бога прославленный, святителю отче наш
Филиппе, величая дивнаго во святых Своих
Господа, восхваляем тя с любовью, яко
усерднаго пред престолом Господним
молитвенника, чуднаго пастыря и мученика, и
от всего сердца вопием ти:

Радуйся, святителю Христов Филиппе,
исповедниче великий и преславный чудотворче.

Икос 1

Ангельския силы радовахуся, святителю отче наш Филиппе, чистому и святому житию твоему, видяще, яко издетска кротость дивную, благочестие и святое послушание являл еси; мы же, благодаряще Господа, тако о тебе благоволившего, прославляем тя яко Божия избранника восхвалениями сими:

Радуйся, родителей твоих плод благословенный.

Радуйся, из млада Господа Бога возлюбивый.

Радуйся, в чистой молитве твоей пред Господом дитя незлобное.

Радуйся, с отрочества житиями угодников Божиих сердце твое питавай.

Радуйся, служб Божиих неленостный посетителю.

Радуйся, книжнаго церковного учения искренний любителю.

Радуйся, наказанию отца твоего духовного зело прилежавый.

Радуйся, пустошным играм, яже детей обычай, нимало же внимавай.

Радуйся, родителей твоих радость и утешение.

Радуйся, всех знаемых твоих похвало и

удивление.

Радуйся, наш святой молитвенниче.

Радуйся, наш дивный учителю.

Радуйся, святителю Христов Филиппе,
исповедниче великий и преславный чудотворче.

Кондак 2

Видел еси, святителю Филиппе, отрок млад
сий, храмов Божиих благолепие, святых
обителей украшение, честных мощей и икон
святых от народа почитание, ярких свещей
горение, фимиама воскурение и купно с
материю твоею службами церковными зело
умилялся еси, красоту же храмов Божиих
вседушно возлюбил еси; и тако благочестиво
возрастая, от юности твоея Отечества Небеснаго
искал еси, идеже Господь во славе, идеже
непрестанная песнь: Аллилуиа.

Икос 2

Разум твой учением слова Божия и молитвою
умудряя, явился еси, святителю Филиппе,
юноша благоденствен, и за премногую твою
добродетель излюблен был еси юным царем
Иоанном, иже тя яко отрасль высокого рода
приблизил к своему престолу царскому и

многими почестями ты украси; ты же, земную славу ни во чтоже вменяя, искушения земных почестей победил еси и о едином на потребу попечение имел еси, сего ради мы тебе радостно восхваляем тако:

Радуйся, от юности добрый и благочестивый рабе Христов.
Радуйся, благоговейная матере твоея верный и послушный сыне и друже.
Радуйся, старцы и старицы добре почитавый.
Радуйся, нищия и убогия зело возлюбивый.
Радуйся, юношеских похотей победителю.
Радуйся, целомудрия рачителю.
Радуйся, церковных песен и Божественных псалтири усердный любителю.
Радуйся, песен срамных, смехотворства и безчинства злаго нелицемерный презрителю.
Радуйся, всякую буесть юности отгнавый.
Радуйся, мудрость Евангельскую возлюбивый.
Радуйся, всех добродетелей вместилище.
Радуйся, благодати Божия искренний причастниче.
Радуйся, святителю Христов Филиппе, исповедниче великий и преславный чудотворче.

Кондак 3

Силою благодати Божия влекомъ, всем сердцем познал еси, угодниче Божий, суету жизни мира сего: того ради внимание к себе цареву видя и общение со избранными слугами того имея, услады душевныя в сих мирских прелестех не обретал еси, но об иноческом житии в сердце твоём помышляя, молился еси о благодатней небесней помощи, и тую в себе ощутив, благодетелю Богу радостно взывал еси: Аллилуиа.

Икос 3

Имея возраст совершен, услышал еси, преподобне отче, в храме Божиим словеса Господа не можете Богу работати и мамоне (Мф. VI. 24), сими словесами Христа Спасителя восхищенный, не приложился еси плоти и крови, но Божию призыву повинуюся со усердною молитвою на устах, заступлением Богоматери и угодников Божиих окормляемъ, оставил еси царское приближение, отчий дом, богатство тленное, и нищ быв, тайне душевнаго ради спасения ко обители преподобных Зосимы и Савватия устремился еси. Таковому твоему

послушанию гласу Господа дивящися, сице
восхваляем тя:

Радуйся, по завету Господа мир и вся, яже в
мире, презревый.

Радуйся, крест Христов на рамена твоя с
веселием возложивый.

Радуйся, путь тесный к Царствию Небесному
избравый.

Радуйся, узкими враты за Господем
последовавый.

Радуйся, богатство мира сего возненавидевый.

Радуйся, Христовой нищете себе смиренно
покоривый.

Радуйся, Господа и Спасителя паче родителей и
дома твоего возлюбивый.

Радуйся, царя земнаго оставивый, да Царю
Небесному всего себе поработиши.

Радуйся, добрый странниче ко Отечеству
Небесному.

Радуйся, безбоязненный путниче к морю-окиану
ледовитому.

Радуйся, земный ангеле.

Радуйся, небесный человеце.

Радуйся, святителю Христов Филиппе,
исповедниче великий и преславный чудотворче.

Кондак 4

Буря смущений найде на тя, святителю Христов, егда Господь, испытуяй любящия Своя, не попусти тя дойти до Лавры Соловецкия, но остави тя в пределах земли Новгородския, у озера Онежского, идеже, в веси Кижѣ, прилепился еси ко единому от жителей страны тоя пасти овцы его. Но в сих напастех ты, угодниче Божий, унынию не вдался еси, радостно же вся Господа ради терпевый. Умильно взывал еси, овцы господина твоего пасый, истинному Пастырю Христу ангельскую песнь: Аллилуиа.

Икос 4

Слышаны быша на озере Онежском подвиги иноков обители Соловецкия, и паки, аки огонь, возгорется желание твое, святителю Филиппе, в сей святей обители во славу Божию потрудитися. Таже, оставль Кижѣ, устремился еси на оток Соловецкий, идеже никим же знаемь, паче же высокородие твое скрывая, смиренныя ради мольбы твоея принят был еси во обитель, да послушание твое Господеви истинно явиши. И послушник быв, вся повеленная тебе во обители радостно творил еси

и своєю воли вседушно отрекся еси. Сего ради в похвалу тебе сице глаголем:

Радуйся, кроткий и смиренный послушнике обители Соловецкия.

Радуйся, повеления игумена и старцев, яко веления Самого Господа, исполнявый.

Радуйся, сечением дров во обители смирение стяжавый.

Радуйся, земли копанием и камения ношением плоть свою обручивый.

Радуйся, аки второй Дамаскин, скаредныя места очищавый.

Радуйся, всякие тягчайшия работы радостно исполнявый.

Радуйся, яко биемь бываем, никакоже злом за зло воздавал еси.

Радуйся, яко многия обиды и уничижения благодушно претерпевал еси.

Радуйся, Христовых заповедей добрый исполнителю.

Радуйся, церковных заветов усердный хранителю.

Радуйся, терпения учителю.

Радуйся, смиренномудрия наставниче.

Радуйся, святителю Христов Филиппе, исповедниче великий и преславный чудотворче.

Кондак 5

Богомыслие пустынное ко святому послушанию приложил еси, отче наш Филиппе, сего ради игумен обители радостно по благому твоему хотению сопричисли тя ко избранному стаду иноков Соловецких и твой постриг во инока соверши; ты же, со страхом и трепетом обеты иночества изрекая, о содействии благодати Божия молился еси и со слезами великого умиления взывал еси Господу: Аллилуиа.

Икос 5

Видеша игумен и братия обители Соловецкия в тебе воистину избранный сосуд Божия благодати: ангельский бо чин восприяв, великих подвигов твоих не оставил еси, преподобне, но всяко смиряя себе, носил еси дрова и воду, огонь возгнeshал еси, в поварне и пекарне прилежно трудился еси, вкупе же паче прежняго в молитве и прочих духовных трудах ходил еси. Егда же иноцы обители начаша восхваляти тя блаженне, ты сея славы людския не стерпел еси, но оставль обитель, удалился еси на том же отоце во едино пусто место. И тамо денно и ношно не едино лето в молитве, чтении Слова Божия и

богомыслии пребывал еси. За таковыя твоя во славу Господа подвиги восхваляем тя усердно:

Радуйся, истинного монашеского жития великий образе.

Радуйся, иноческих обетов пламенный исполнителю.

Радуйся, дневными и ночными подвигами плоть твою всецело духови покоривый.

Радуйся, молитве Иисусовой усердно прилежавый.

Радуйся, умную молитву от Господа стяжавый.

Радуйся, древним восточным подвижником искренний подражателю.

Радуйся, токмо в молитве ко Господу все утешение полагавый.

Радуйся, сладостным общением с Господом в пустыни дух твой питаवый.

Радуйся, Божия Матере любимиче.

Радуйся, Ангелов собеседниче.

Радуйся, наше верное прибежище.

Радуйся, наше светлое упование.

Радуйся, святителю Христов Филиппе, исповедниче великий и преславный чудотворче.

Кондак 6

Проповедник словом и делом чистаго и святаго монашескаго жития был еси, святителю Филиппе, сего ради игумен, престарелый в летех, вкупе с братиею обители умоли твое смирение прияти высокое звание иноков начальника и священства, да водимая тобою святая обитель яко яркий светильник всея Руси православныя явится, да иноцы и мирстии людие, молящиеся в ней, возрастают от силы в силу, воспевая Богу: Аллилуиа.

Икос 6

Возсия светом велиим обитель Соловецкая, егда святитель Филипп, гласу Божию повинуюся, восприял бремя тяжкое игуменства монастырскаго. Святый игумен, по заповеди Господа, себе самого яко слугу всех вмени, телесным бо трудом и молитвенным подвигом паче прежняго себе предавая, Христоподражательным своим нравом и иноческим житием братию без слова пленяше, таже чин церковнаго богослужения исправляше и о благоукрашении святаго обители попечение имеяше. Воспоминающе убо славные труды сего дивнаго игумена, восхваляем его тако:

Радуйся, Соловецкия обители мудрый управителю.

Радуйся, братии обители кроткий и смиренный начальниче.

Радуйся, о вечном спасении братии слезно ко Господу взывавый.

Радуйся, скорби и радости иноков в сердце твоём не тесно вмещавый.

Радуйся, яко поучения инокам усердно вещал еси.

Радуйся, яко Евангельския законы в сердца их глубоко внедрял еси.

Радуйся, добрым иноком сугубую честь воздававый.

Радуйся, строптивыя и нерадивыя иноки судом Божиим вразумлявый.

Радуйся, Христовыя любве и небеснаго мира усердный благовестниче.

Радуйся, вечныя правды Христовы твердый поборниче.

Радуйся, иноческих уставов ревнителю.

Радуйся, красоты церковных служб рачителю.

Радуйся, святителю Христов Филиппе, исповедниче великий и преславный чудотворче.

Кондак 7

Хотящих честне изобразити чудныя дела игуменства твоего вразуми, святителю Филиппе: недоумет бо язык человеческий изрещи достойныя хвалы денным и нощным трудам твоим: твоему о благоуукрашении обители попечению, твоему уставом церковным послушанию, твоим слезам молитвенным, твоим воздыханием сердечным, твоему пустынному уединению. Обаче в толиких безмерных трудах твоих силу благодати Божественныя видяще, усердно вопием щедродателю Господу Богу ангельскую песнь: Аллилуиа.

Икос 7

Новый Зосима явился еси обители твоей, святителю Филиппе. Всею душою твоею живя в Господе, присно в молитве пребывая, слезами умиления покрывая ложе твое, ты, святителю великий, не забыл еси и великого дела домовного строительства: новые храмы и скиты воздвигал еси, блатныя места осушал еси, пути по отоку Соловецкому исправлял еси, братския дома, больницы и прочия строения обители созидал еси. Таковому твоему доброделанию дивящися, тако похваляем тя:

Радуйся, преподобному Савватию в молитве и духовнем делании подобный. Радуйся, по домовому строительству и во игуменстве великому Зосиме равный. Радуйся, преподобному Герману в твердей вере и светем на Господа уповании подражавый. Радуйся, добродетели всех Соловецких подвижников усвоивый. Радуйся, честнаго Успения Богоматере и Боголепаго Спасова Преображения храмов мудрый зиждителю. Радуйся, пустыни твоего имене и скитов обители основателю. Радуйся, пресныя воды Соловецких источников во едином Святем озере совокупивый. Радуйся, в красотах севернаго неба славу Премудраго Творца вселенной умильно созерцавый. Радуйся, всякую пядь земли отоков Соловецких твоими честными стопами освятивый. Радуйся, чащи лесныя и брега морския слезами умиления обильно орошавый. Радуйся, пред Богом молитвенниче наш усердный. Радуйся, святителю Христов Филиппе, исповедниче великий и преславный чудотворче.

Кондак 8

Странник безвестен и проситель смиренный иноческого послушания у врат обители Соловецкия явился еси, Филииппе, но како духовных твоих доблестей ради содеяся славно имя твое блаженнее, град бо Москва и вся Русь православная познаша в тебе яве добродетелей твоих светлость и молитв твоих силу; сего ради и был еси вождь духовен всея Руси святых и всех, спасения ищущих, во еже взывати Господу: Аллилуиа.

Икос 8

Всею душею и телом обители преподобных Зосимы и Савватия поработал еси, отче преподобне, сего ради о нуждах обители сея зело прилежал еси и о сих царя Иоанна Грозного извещал еси. Грозный же царь, юношеския дружбы твоя и подвигов твоих иноческих ради щедро обители твоей снабдение творяще, подражающе же ему, и прочии града Москвы обитателие от трудов твоих обители прилежаху, и к молитвенному твоему заступлению притекающе, тако прославляху тя:

Радуйся, от царских чертогов до иноческа
нищеты нисшедый.
Радуйся, честь земную на богатство
неоскудевающее пременивый.
Радуйся, Божественная литургия пламенный
совершителю.
Радуйся, слова Божия усердный изъяснителю.
Радуйся, иноческими подвигами твоими
родительницу твою возвеселивый и житием
твоим ко иночестей жизни склонивый.
Радуйся, нужды отечества твоего земнаго в
сердце твоём имевый и о них пред Богом слезы
источивый.
Радуйся, мирских людей наставниче.
Радуйся, столпе православия непоколебимый.
Радуйся, истины поборниче неодоленный.
Радуйся, утешение всех скорбящих.
Радуйся, отрадо к твоей помощи всех
прибегающих.
Радуйся, святителю Христов Филиппе,
исповедниче великий и преславный чудотворче.

Кондак 9

Всяк возраст и чин града Москвы зело
возрадовася, егда изыде весть о приятии тобою,
смирненным игуменом Соловецким, чести и сана

первосвятителя Церкви Российския. Ведомо бо бе людем русским и прежнее твое к царю приближение, и царское твоих иноческих подвигов почитание. Сего ради упованием светлым сердца их исполнишася: новый бо первосвятитель истинный и мощный печальник и заступник пред Грозным царем о всех обидимых и правды ради гонимых восстанет, и в сей великой радости и надежде возгласиша Благодарителю всех Богу благодарственно хвалебную песнь: Аллилуиа.

Икос 9

Ветийствующий язык человеческий не возможет достойне изобразити труды и скорби твоя, святителю Филиппе, на первосвятительском престоле Церкви Российския. Грозный бо царь в тыя дни свою державу злою причиною возмути: люди русские зело сокрушахуся, егда о убиении мужей неповинных слышаху и казни жестокия видяху. И ты, ревнителю Божий, сию неправду цареву видя, в защищение верных сынов русских дерзновенно глас свой возвысил еси и, входя к царю, кротко того поучал еси, и причину злую упразднити и убиения невинных прекратити

умолял еси. И благослови Господь святительское твое пред царем Грозным печалование. Царь Иоанн, твоим мольбам и слезам внемля, гнев свой на время укроти. Народ же русский и град Москва твое мощное пред царем заступление видяще, сице радостно восхваляху тя:

Радуйся, архиерею истинный.
Радуйся, яко второй Моисей бремене всего народа русскаго носителю.
Радуйся, граду Москве и всему народу русскому словес Божественных усердный изъяснителю.
Радуйся, российский Златоусте, устами златыми Божия правды и суда Христова провозвестниче.
Радуйся, царя и людей русских во апостольских и отеческих преданиях мудрый наставниче.
Радуйся, непокоряющихся Божьему закону грозный запретителю.
Радуйся, Грознаго царя искренний, нелицеприятный и нельстивый друже.
Радуйся, об исполнении пути его и о вечном его спасении усердный и слезный молитвенниче.
Радуйся, злых опричнины деяний безбоязненный обличителю.
Радуйся, обидимых защитниче и скорбящих душею утешителю.
Радуйся, всех заветов Евангелия Христова

смиренный исповедниче.
Радуйся, о земных наших скорбех милостивый
печальниче.
Радуйся, святителю Христов Филиппе,
исповедниче великий и преславный чудотворче.

Кондак 10

Спасти хотя всю Русь православную от
суемудренного свирепства царского, яко
пастырь добрый, душу твою за паству положить
готовый, ты, святителю Христов, всенародно
ярость самонравного царя на кротость
преложити потщался еси. О новых же
злодеяниях опричнины уведев и гнев царский
на себе испытав, к венцу мученическому
приуготовил себе и в благодатном умилении ко
Господу взывал еси чистыми твоими устами
хвалебную песнь: Аллилуиа.

Икос 10

Царя Грозного ярость и свирепство зело
угобзил еси, святителю отче наш Филиппе, егда
Христову учению внимая, во храме Владычицы
честного Ея Успения новыя беззакония царя
Грозного обличив еси, еще же и опричника в
глумлении над Евангелием укорил еси. За сие

твое дерзновение судом неправедным святительского сана лишен был еси, в храме Божиим злыми опричниками во святительском одеянии обезчестен был еси и муки жестокия, в темницу ввержен, претерпел еси. Последи же, от смерти избавлен быв, во Отрочь монастырь во изгнание послан был еси. Чада же твоя духовная, твоё поругание и страдание видяще, со слезами возглашаху тебе сия:

Радуйся, страдальче наш незлобивый.
Радуйся, паству твою до смерти возлюбивый.
Радуйся, пророку Илии и Предтече Господню во обличении царя беззаконнаго уподобивыйся.
Радуйся, учение Христово в доме царstem аки вторый Павел проповедавый.
Радуйся, великому Амвросию, епископу Медиолана, единоправный.
Радуйся, безбоязненный правды поборниче.
Радуйся, аки вторый Златоуст безчестие и изгнание от царя претерпевый.
Радуйся, о вразумлении царя Грознаго яко верный Христов пастырь непрестанно моливыйся.
Радуйся, наш благий и великий святителю.
Радуйся, наш златословесный учителю.
Радуйся, яко твоему подвигу Ангели

возрадовашася.

Радуйся, яко твоему исповедничеству вся вселенная дивится.

Радуйся, святителю Христов Филиппе, исповедниче великий и преславный чудотворче.

Кондак 11

Пение надгробное со слезами скорбными град Москву, обитель Соловецкую и всю Русь православную огласи, егда во вся концы отечества нашего изыде весть о мученической кончине твоей, наш дивный исповедниче. Смерть бо неправедную, горькую, во Отроче монастыре от рук злаго слуги царского восприял еси. Присно со Христом пребывая, молитву за убийц твоих творил еси, святителю, егда праведная душа твоя от тела нуждею разлучашеся. Мы же, прославляюще твою страдальческую кончину, со слезами умиления вопием премудрому Господу: Аллилуиа.

Икос 11

Свет благодатных исцелений обильно возсия от честных мощей твоих, святителю Филиппе, первее в Соловецкой обители, а послежде во граде Москве, в нюже многоцелебныя мощи

твоя великим Никоном пренесошася. К сим
мощем припадающе, в похвалу тебе, наш
великий святителю, тако глаголем:

Радуйся, возвращением твоим в Соловецкую
обитель братию обители зело возвеселивый.
Радуйся, игуменство твое в ней духовне
возобновивый.

Радуйся, яко Соловецкая обитель части мощей
твоих благодарне поклоняется.

Радуйся, яко сию часть мощей твоих обитель
твоя, яко драгоценную жемчужину, почитает.

Радуйся, яко прославлением честнаго твоего
тела и град Москву и все отечество наше
возвеличил еси.

Радуйся, яко чудесами от нетленных мощей
твоих благочестие в стране нашей умножил еси.

Радуйся, святителем Христовым Петру, Алексию
и Ионе единоправный.

Радуйся, подвигом твоим святителя Ермогена на
великое пастырское дерзновение
воодушевивый.

Радуйся, светозарное солнце земли Российския.

Радуйся, разумного света заре.

Радуйся, светило церковное и архиерейская
красото.

Радуйся, небесных законов на земли живая

проповедь и хриstopодражательного жития образе.

Радуйся, святителю Христов Филиппе, исповедниче великий и преславный чудотворче.

Кондак 12

Благодать святаго дерзновения безбоязненно делом и словом вещати Христово учение подаждь нам, немощным, великий угодниче Божий и святителю Филиппе, наипаче подаждь сию благодать пастырем Церкви Христовыя, да возмогут они немолчно свою духовную паству учить и вразумляти, лицепрятия избегати, да таковое дерзновение стяжавше, вси мы на благом пути ко спасению обрящемся и сподобимся в вечном Небесном Царствии выну воспевати Господу: Аллилуиа.

Икос 12

Поюще твое дивное житие, твоя иноческия подвиги на отоце Соловецком воспевающе, твою святительскую ревность и дерзновение восхваляюще, поклоняющесе твоему до крове правдолюбию и исповедничеству, святителю отче наш Филиппе, молим тя в борениях и искушениях многоразличных не оставляти нас,

но наипаче твоими молитвами укрепити, да
возможем и мы твоими подражательми быти и
тебе, нашего отца и наставника, восхваляти
сице:

Радуйся, звездо Российская.
Радуйся, чистый сосуде Святаго Духа.
Радуйся, вселенским мучеником и исповедником
подобниче.

Радуйся, Церкви Российския похвало и всего
священства украшение.

Радуйся, иноческих кротости образе.

Радуйся, монашеского постнического
жительства истинное правило.

Радуйся, безплотных сожителю.

Радуйся, Христова смирения ревнителю.

Радуйся, чудес велиих совершителю.

Радуйся, о скорбех земнаго отечества твоего
милостивый пред Богом печальниче.

Радуйся, яко тобою Соловецкая обитель
славится.

Радуйся, яко тобою град Москва и вся Россия
украшается.

Радуйся, святителю Христов Филиппе,
исповедниче великий и преславный чудотворче.

Кондак 13

О, великий святителю Христов Филиппе! приими от нас, грешных, сие похвальное пение и священными твоими молитвами тя поющая в мире сохрани, от напастей и бед избави, во святей православной вере укрепи, угодное Богу житие проводити помози, уныние наше в радость претвори, дух крепкого стояния за церковныя законы и церковныя предания обнови в нас, да тако сподобимся во веки в райских обителях воспевати нашему Пастыреначальнику и Господу: Аллилуиа. Аллилуиа. Аллилуиа

Этот кондак читается трижды, затем икос 1 и кондак 1.

